

# Elak pekerja ditindas

**Bakal rangka undang-undang elak wujud penindasan pekerja ekonomi gig**

KUALA LUMPUR

**K**erajaan sedang mengkaji untuk merangka undang-undang bagi mengelak berlakunya penindasan majikan ke atas kebajikan pekerja ekonomi gig di Malaysia.

Perdana Menteri, Tun Dr Mahathir Mohamad berkata, Malaysia masih belum mempunyai garis panduan atau peraturan berkaitan yang membolehkan tindakan dikenakan terhadap majikan yang didapati menindas pekerja sektor ekonomi gig.

"Foodpanda adalah antara ekonomi gig pertama di Malaysia.

"Pada masa mereka perkenal sistem itu, kita tidak mahir. Sebab itu tiada peraturan atau undang-undang.

"Mungkin ada majikan yang aniaya mereka. Waktu ini, belum ada peraturan dan undang-undang," katanya pada sesi Waktu Pertanyaan-Pertanyaan Menteri di Dewan Rakyat di sini semalam.

Ekonomi gig adalah satu kegiatan ekonomi yang dijalankan oleh individu tanpa ada majikan dengan cara menjual perkhidmatan kepada orang lain dan dijalankan sama ada untuk sepeenuh masa atau separuh masa.

Beliau menjawab soalan **Datuk Dr Noor Azmi Ghazali (PH-Bagan Serai)** yang ingin tahu adakah kerajaan akan mengadakan suatu garis panduan kepada mereka yang terlibat dalam ekonomi gig di Malaysia.

Dr Mahathir berkata, kerajaan menubuhkan satu jawatankuasa khas disertai tiga kementerian yang merangka penyelesaian jangka panjang terhadap pelbagai isu ekonomi gig.

Menurut Perdana Menteri, kementerian yang terlibat adalah Kementerian Belia dan Sukan, Kementerian Sumber Manusia dan Kementerian Perdagangan Dalam Negeri dan Hal Ehwal Pengguna.

"Kementerian Sumber Manusia



DR MAHATHIR

akan menjalankan kajian terperinci membabitkan takrifan perundangan terma dan syarat pekerjaan industri ekonomi gig selaras trend ekonomi di bawah Industri 4.0," katanya.

Jelasnya, jawatankuasa itu turut berperanan menumpukan ekonomi gig sebagai sumber pertumbuhan ekonomi baharu, mampan dan inklusif dalam Rancangan Malaysia Ke-12 (2021-

2025).

Beliau menjawab soalan **Fahmi Fadzil (PH-Lembah Pantai)** sama ada kerajaan berhasrat mengawal selia sektor ekonomi gig khususnya skim pembayaran syarikat Foodpanda.

Katanya, ekonomi gig mampu menjadi sumber pertumbuhan ekonomi baru serta peluang rakyat meningkatkan pendapatan.

Kepada soalan tambahan **Datuk Ahmad Maslan (BN-Pontian)** yang ingin tahu pandangan kerajaan terhadap pekerja sektor ekonomi gig, Dr Mahathir berkata, ekonomi gig memberi peluang kepada rakyat terutama mereka yang menganggur untuk mencari pendapatan halal. - *Bernama*